

OFFERYNNAU STATUDOL CYMRU

2005 Rhif 424 (Cy.42)

Y GWASANAETH IECHYD GWLADOL, CYMRU

Rheoliadau Deddf Iechyd a Gofal Cymdeithasol
(Iechyd Cymunedol a Safonau) 2003
(Arolygiadau Gofal Iechyd) (Cymru) 2005

Wedi'u gwneud - - *1 Mawrth 2005*

Yn dod i rym - - *31 Mawrth 2005*

Mae Cynulliad Cenedlaethol Cymru, drwy arfer y pwerau a roddwyd iddo gan adran 75(1) a (2) ac adran 195 o Ddeddf Iechyd a Gofal Cymdeithasol (Iechyd Cymunedol a Safonau) 2003(1) yn gwneud y Rheoliadau a ganlyn:

Enwi, cychwyn, cymhwyso a dehongli

1.—(1) Enw'r Rheoliadau hyn yw Rheoliadau Deddf Iechyd a Gofal Cymdeithasol (Iechyd Cymunedol a Safonau) 2003 (Arolygiadau Gofal Iechyd) (Cymru) 2005, a deuant i rym ar 31 Mawrth 2005.

(2) Mae'r Rheoliadau hyn yn gymwys mewn perthynas â Chymru yn unig.

(3) Yn y Rheoliadau hyn—

ystyr “y Cynulliad” (“*the Assembly*”) yw Cynulliad Cenedlaethol Cymru;

ystyr “darparwr gwasanaeth” (“*service provider*”) yw person sy'n darparu gofal iechyd i gorff GIG Cymru, neu sydd wedi gwneud hynny neu a fydd yn gwneud hynny(2); ac

ystyr “y Ddeddf” (“*the Act*”) yw Deddf Iechyd a Gofal Cymdeithasol (Iechyd Cymunedol a Safonau) 2003.

Y pŵer i ofyn am esboniad

2.—(1) Caiff y Cynulliad, neu bersonau a awdurdodwyd ganddo, ei gwneud yn ofynnol i unrhyw berson a ragnodwyd ym mharagraff (4) i ddarparu esboniad i'r Cynulliad neu i bersonau a awdurdodwyd felly (yn ôl y digwydd)—

(1) 2003 p.43. Gweler adran 148 o'r Ddeddf am y diffiniad o “prescribed”.

(2) Gweler adran 149 o'r Ddeddf am sut i ddehongli cyfeiriadau at ofal iechyd a ddarperir gan un person ar gyfer person arall. Gweler adran 45(2) o'r Ddeddf am y diffiniad o “health care”. Gweler adran 148 o'r Ddeddf am y diffiniad o “Welsh NHS body”.

- (a) unrhyw ddogfennau, cofnodion neu eitemau a arolygwyd, a gopiwyd neu a ddarparwyd o dan adrannau 72 i 74 o'r Ddeddf;
- (b) unrhyw wybodaeth a ddarparwyd o dan yr adrannau hynny; neu
- (c) unrhyw faterion sydd yn destun arfer unrhyw un o swyddogaethau'r Cynulliad o dan adran 70 o'r Ddeddf,

mewn amgylchiadau pan fo'r Cynulliad yn ystyried y byddai esboniad yn angenrheidiol neu'n hwylus at ddibenion Pennod 4 o Ran 2 o'r Ddeddf.

(2) Caiff y Cynulliad, neu'r personau a awdurdodwyd ganddo, ei gwneud yn ofynnol i'r esboniad gael ei roi—

- (a) yn bersonol (ac eithrio pan fo'r person y mae'n ofynnol iddo roi'r esboniad yn gorff neu yn bersonau corfforaethol neu anghorfforaethol); neu
- (b) yn ysgrifenedig.

(3) Pan fo'r Cynulliad, neu'r personau a awdurdodwyd ganddo, yn ei gwneud yn ofynnol i'r esboniad gael ei roi'n bersonol, rhaid rhoi'r esboniad ar adeg ac mewn man a bennir gan y Cynulliad, a rhaid i'r Cynulliad roi hysbysiad rhesymol i'r person y mae'n ofynnol iddo roi'r esboniad o'r amser hwnnw a'r man hwnnw.

(4) Dyma'r personau rhagnodedig—

- (a) corff GIG Cymru;
- (b) cadeirydd, aelod, cyfarwyddwr neu gyflogai o gorff GIG Cymru;
- (c) aelod o bwyllgor neu is-bwyllgor corff GIG Cymru;
- (ch) darparwr gwasanaeth;
- (d) cadeirydd, cyfarwyddwr neu gyflogai darparwr gwasanaeth;
- (dd) person (heblaw am berson a ragnodwyd yn is-baragraff (d)) sydd yn cynorthwyo darparwr gwasanaeth wrth iddo ddarparu gofal iechyd ar gyfer corff GIG Cymru;
- (e) awdurdod lleol neu aelod neu swyddog o awdurdod lleol;
- (f) maer etholedig awdurdod lleol o fewn ystyr adran 39(1) o Ddeddf Llywodraeth Leol 2000(3);
- (ff) person (heblaw am berson a ragnodwyd uchod) sydd yn cynorthwyo corff GIG Cymru wrth arfer ei swyddogaethau, neu sydd wedi gwneud hynny neu a fydd yn gwneud hynny.

Llofnodwyd ar ran Cynulliad Cenedlaethol Cymru o dan adran 66(1) o Ddeddf Llywodraeth Cymru 1998(4)

1 Mawrth 2005

John Marek
Dirprwy Lywydd y Cynulliad Cenedlaethol

(3) 2000 p.22.

(4) 1998 p.38

EXPLANATORY NOTE

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn gwneud darpariaeth mewn perthynas â swyddogaethau Cynulliad Cenedlaethol Cymru fel y'u nodir ym Mhennod 4 o Ran 2 ("Pennod 4") o Ddeddf Iechyd a Gofal Cymdeithasol (Iechyd Cymunedol a Safonau) 2003 (p.43).

Mae rheoliad 2 yn darparu y gall y Cynulliad, neu bersonau a awdurdodwyd ganddo, gael esboniad o ddogfennau neu wybodaeth a gafwyd gan y Cynulliad wrth iddo arfer ei swyddogaethau o dan Bennod 4.

Ni chynhyrchwyd asesiad effaith reoleiddiol llawn ar gyfer yr offeryn hwn, gan nad yw'n effeithio ar gostau busnes.